

姑溪居士全集

三





姑溪居士全集

(三)

李之儀撰

姑溪居士文集卷第二十四

手簡

與榮天和

前日忽遽問途。不得一就別。暑中奔馳勞倦。殊不知其況。然頗有山水登覽之勝。隨地樽酒之樂。極奉思也。昨晚還家。骨肉輩首及動靜。伏承日來體力佳健。病倦未能接人事。未果上謁。庶幾見亮。比得劉孝嗣書。委曲久不見其人。得書如與之款。欽崎磊落。尤使人歎想不已。有間便當致報。幸相及也。吳思道到京。必多日。得書否。不一不一。

又

初寒。伏惟起居住佳勝。日者到家才二十日。竟未得一相見。搶攘叢委。殆不容應接。雖嘗過問。然不敏之愧。無以自控。村落間別是一種意味。忽忽幾不欲捨之而去。豈鹿豕之遊。天所賦邪。無由屈致晤語。但深惜結。

又

素不習田畝間事。既來頓覺有味。似是本來境界。亦不自知其然也。霜降風冷。歲物崢嶸。又將一年矣。老人貪生。尤以爲懼爾。食貧不易支梧。有求必應。固不可忽。高介不與流俗拘。豈亦知非人所及。啜菽飲水。

當取以爲樂而不厭。前世孟東野賈閬仙輩。蓋亦如之。推而上之。信所樂非窮通也。

又

思道向借去兩畫像。已取其一。東坡者。欲煩天和爲取之。千萬留意。恐其偶不記見還爾。本欲作渠書。爲此事。又恐已來竊意天和居第不相遠。可以必得。雖其不在。亦可取。如取得。且留天和處。候不肖歸見及。專奉託。幸挂念。

又

早寒。伏惟起居住佳勝。前日登門。輒留刺。擾擾不自給。未能從容相款。極不滿意也。辱手示。欽佩眷厚。作字素非所工。又多事之際。恐累佳紙。姑俟旦夕投隙。尙多應命淹晚。至愧介還。方起枕草率。滋畏不一。

又

霜寒。伏惟起居住佳勝。累辱垂顧。牽迫未果。脩謝。愧詠不展。蒙手示具領厚意。疏文極工。必有副本。姑留爲矜式。苟不屑行。當展翰之。早晚上謁。

又

累承垂顧。至感。日復一日。竟未得卜一勝處。爲終日之會。未始忘懷也。蒙問并疏軸失契。勘作字軋大。更爾奉煩。皇恐。皇恐。謹復上納。甚愧有玷高文也。得暇祇謁。

又

多日不接語。每見吳師道。卽問動靜。寒色伏惟爲況佳適。示諭媿感。初亦未知也。少年膺此重任。能盡瘁體國。則親黨與榮焉。疇昔固可觀也。幾日有太平之行。前此略相顧幸甚。

與劉延仲

某啓。大雨蒸溼。伏惟起居佳勝。累欲煩公作包鉤魚。煮江南羹。爲一日語笑。病齒大瀉。已而道絕。不可出。信佳事爲不易得也。昨日領手帖。存問周至。感激無已。穎昌已有報。得敕辭罷便行。聞公使短未竟。果了。可來作同官否。乳泉賦等諸文。并望付來介。閱畢卽馳還。正本或不在。卽所傳者尤佳。不敢留多日也。路道上謁次。企渴。企渴。

又

大暑。伏惟侍奉起居萬福。久不奉周旋。傾思固不能遣。東歸屢款禪林。已而稍接巨載兄弟。且獲與誠父一往還。獨遠君子。念之常不自得。然西來相知。道雍容湖山間。真風塵外人矣。想像佳句。倍深耿耿。比得疾淹久。衰晚殆支持不能。惟僅脫死耳。外事廢阻。殊不聞舟御已到。先枉手筆。佩荷慰懌可量。鄙陋氣劣多。寫字未得。累年願見之懷。且非尺牘可具也。敬俟上謁。

又

比登門不獲見。累日方欲繼之。特未暇也。示問甚寵感。刻乍晴。侍奉佳勝。亂道上還。一二日再奉見次。

又

比幸經由。不得奉款晤。少別。豈勝系仰。霜晴爲覘如何。佳期定何日。無由進與席末。但深傾向。庶幾回輒。獲遂相盡。

又

風埃伏惟起居佳勝。到此日欲展近。牽迫殆不容出頭。初不謂至是也。瞻企拳拳。可勝道哉。蒙手示具領。勤厚。三二日當前詣。才歸。草率至愧。

又

早來欲詣見。偶爲賓客留連。比到一二處。不覺侵晚。密阻鄙豈勝拳拳。夜歸辱手筆。恭審侍奉起居佳勝。約食固佩勤厚。屬二十一決成行。尙有不得已人事。勢須略遍。輟身不得。遂失臨寵之意。愧恨可知。旦夕當幸承晤。燈下草率至悚。

又

早來客在門。起又差晚。索書擁至。對來使極滅裂。慚負可勝言邪。少間不審起居何似。佳楮固已過厚。二缶所緘紙極精。但未知包藏如何耳。一笑一笑。亂道或未寫得。略告授去介。少閱便歸納。次尊公不敢率易上啓。望侍次申敬。

又

風埃承爲覘甚佳。極慰瞻企。蒙問愧荷。便欲祇遣。而客來不已。殆未能輟身。良眷眷也。馬復自早出矣。少

間暫遣所乘代步。到左右如何。參寥聰師。並煩申敘。甚欲相見。能少留見待否。

與劉君秉

拜別易得歲月。雖東西相望。然超世之韵。常在眉睫間。兩附遞上記。一次捧教筆。自到京。一向藏縮。遂不復與四方親舊講好。然薄從東位諸君。與承動靜。晚又得文思子舍。尤爲詳盡。正初迄今日。幸迎謁。不謂遲回如此。比得寒疾四十餘日。都不聞外事。忽披翰墨。恍若夢寐相接。其爲慰浣。可勝眷眷。大暑。恭審捨舟卽安。尊履佳豫。區區困劣。兩日來方作字成。勉強具報。纔出。首當上謁。次。

又

連日出城。入夜方到家。雨溽蒸熱。徑就臥。欲見旣未能自慰。而執筆之間。亦復不果。雖致問展敘。因茲不逮。蒙手筆。敬審尊體。動止萬福。昨夜拜賜已二鼓後。不時具謝。悚悚。一二日圖奉款晤。次。欽跂。欽跂。

與趙仲強兄弟

某啓。蒸溽。意況從而不佳。瞻思之勤。滋不能已。不審體況復何似。君求又有書附問。今以小紙奉呈。如聞朝夕。過巨載家。庶幾獲逢款晤。餘遲相見具道。

又

累日不聞動靜。馳仰無喻。晴色漸融。恭惟尊履萬福。辱問勤懇。欽佩寵眷。而辭藻爛然。尤畏不可及也。投閒修敬門下。入夜布敍草略。皇恐。

又

久不交馳。方劇傾仰。夢寐屢投。可見於公厚薄也。方作書欲浼左右。忽叨翰墨。敦諭稠重。可勝欣感。兼知已赴朝謁。飲食起居如常日。喜慰尤不能已。然更宜過常持攝。無忘前日之灼艾用醫也。不罪僭言。區區本圖。此月一到京。雨不止。道路如江河。勢須少待。骨肉輩未來。獨處不無牢落。頗亦見念否。一笑。一笑。

又

日欲望門。遽有行色。遂成鉅錮。然二十七日。猶幸一見。而中途雨大作乃已。累日尊履復何似。區區最荷垂恤。旣不得旦暮親近。爲不足。於是又不得面別。黯然其何能已。九月十月之交。沿檄到京。首圖展奉。次餘惟千萬加愛。依戀。依戀。

又

間色山和尚背子段一枚。僭易上獻。仲強絕韻貴仕。而又文采足以相輝。聊託雅好。尙有緒餘。偶索之未到。才至卽附便次。

又

比以東坡卽世。諸況不佳。十許日來。方有生意。書問稀阻。端爲此也。然別來三月。三夢追逐。豈非高義相予之厚。有以致之。不然。別自有人見念。故如此。又恐只是自家妄想也。一笑。一笑。仲南往京少味。捨公誰與周旋者。幸時溫之。不妙投懽赴醉之際。瀝洒見向。比窘迎新送舊。外方小官。況味甚惡。未暇周悉。續當

別上問次。瞻企。瞻企。

又

仲強大慰。必相見稍疎。閑忙有間。故應如是。本欲作書。冗甚未及。極思渴。亦作得數詩。錄寄不暇矣。容後信也。江外酒如釀灰汁。勉強濡脣。必暴下如注。老來恐一飲便脫。可無念乎。向才得一罇。似減正潤風采。一笑。

又

比以親舊往來南北。多至郊外留連。稍阻參問。亦若乏人通記。瞻企風義。鄙心不問毫髮。方圖早晚修敬。澤之見過。特荷存恤。既非區區所素。但皇恐不自勝。而高明或未亮者。是將據我於爐炭之上也。氣候蒸溼。恭審清晨。尊履佳裕。一二日徑造門第。所懷當候躬致。

姑溪居士文集卷第二十五

手簡

與趙仲強兄弟

小詩特爲戲耳。牽聯爲用。自是無可作做。搜索往還。豈有他也。元確兄弟曲相符同。此正是措大家常茶飯。過蒙留念。慙悚不勝。所以得罪左右。但日欲登門而未及。併俟旦夕負荆次。

又

月餘不奉款席。思仰未始置懷抱。氣候不定。尊履當復何似。比苦脾疾。極無聊。加之親舊間。病者相繼。勢須且徧省視。故輟身不得。深幸有以見亮也。親庭必已歸。後圃陰合池。而荷已離水。圖書環遶。筆墨吟歎。參次而會。又復絕世獨立。相予抑揚勝致。方是時。天下豈能彷彿藩籬。高明亦豈知有天下事邪。欽跂。欽跂。尙阻周旋。不勝向往之深。謹具上問。

又

季秋霜冷。恭惟台候萬福。雍容朝路。孰不腰金佩玉。煌煌交映。然文章足以表見。議論足以稽考。蔚爲本支典刑。而士大夫相望。願親近而不可得。則捨高明數公。復何人哉。流落何堪。幾三十年。爲河間賓客矣。詠懷疇昔。恨無術可以縮地。尙覲聞望愈隆。建旄分社。永爲帝室賢輔。

又

相別不覺許久。書問曠三二年才一講。初意門下之迹已掃。不謂記錄不替毫髮。而書來疊疊有加。風義久不傳於世。枯卉可復再榮。惟風義不衰。則乃有向榮之望。固知盛德所鍾。亦自愧不振。一至是爾。高文麗句。頃獲成誦。別後不得一歷眼。是不足訓邪。抑因循所玩也。衰茶或未見棄。時丐筆吏。傳爲異鄉警策。實假寵於我爲重。狂狷或時有之。私居之筆力。未果求教。徐圖上浼。園亭之勝。幸一一疏示所因。或得附各詠歌之後。豈非至願。

又

荒粹流穢。終乃几案間一物。不謂一別便爾懸阻。窮荒衰陋。無聞見。無商確。無圖籍可考。凡爾枯株。但未死耳。每懷從仲康。仲強談笑緒餘之末。劇飲狂笑。開形吟賦。初不計尙得生今日。緬懷一夢。可勝感歎。越寄缺甃間。但以目前爲遣。免異時縱得再奉。餘亦無頃昔人矣。向風幾至酸鼻。

又

薛夫人尊候萬福。後來更有幾明珠。平日嘗獲瞻望者。計獨蒙不棄青氈。異時樂院。想多列屋而閑居。但見思道。子椿。諸君云。絲竹未嘗少輟。德美才秀。而福與之俱。可咫尺輕有所彷彿哉。子舍必多在官守。令弟想各進擢矣。令壻學士。恨未參識。書局料不能久。仲惇諸姪。當已出仕。

又

衰莫淪落如在井中奄奄未絕時於缺甃間望見青天白日心知其然而無一援之而出者故一得賜書未嘗不感慨梗塞期尺素於可援而杳無與應終歸之於造物亦未能果爾一決也歲云莫矣其懷抱可知比辱思道處腳力所傳手筆惇諭疊疊固已不勝負荷而思道子椿書中具道周旋記錄誠義有加而不已反覆翰墨紬繹二君之傳但愕眙宛轉無地自控惟改易昔人詩語以寫其憂云安得而黃鵠攜之置其傍暑候已深日來復不審台候起居何似不腆之於門下殆非苟然者十年漂泊親戚朋友號嘯昔之厚者或近在咫尺或便道吾廬尺紙之不通與來略敘寒溫既見而不情之語如湧至掉臂而不顧者往往而然獨吾仲強瑩如冰玉無一瑕可指而凜凜見圖如一片天成地貢以表表稽之物理未易形容似是佛語所謂百千萬億劫相因以至是也感激之深筆次不覺縷縷何時一奉促膝之款向往滋劇

又

清晨伏惟起居住勝到此至於一拜見既不得從容遂計餘日獲盡鄙意昨日已具馬將北去遽報東坡喪舟來亟往郊外致奠愴猝不卽爲問似於豫約鉏鋤極不登所願也只今且歸無緣再款門第飲焉系戀若不容自控到潁昌時得申致次欽詠欽詠

又

經宿恭惟尊候萬福少別思詠不暫忘於是得奉頃刻固已甚慰而未獲傾盡尤不能已方圖脩記遽枉手筆敦敍稠重感服無已朝夕再當祇造百冗具報草略皇悚欽跋欽跋

又

去冬了葬事。今年三月。遂徙家太平。早時欲隨援而出。今復再墜。豈造物者終使間間於此。無復可出之期邪。抑困之至極。而訖有以副其必援也。所冀無他。姑欲一至國門。與平日所厚。如吾仲強一二人。傾倒數十日。遂別此生爾。悵然未得之間。可量繾綣。方時炎酷。拂雲之樗。皆有超世之趣。歌舞醉笑之餘。自倣於垂世立教。興亡治亂。吟風詠月。抑揚頓挫之際。爲河間東平。所以爲樂則盡矣。至於平臺賦就。而鄒陽枚乘。蕭颯偃偃。欲進而不可得。則不審尙能歎息以期之已否。三月末。纔捨舟。便爲暴下所乘。淹延四五日。至灼艾。方小康。今猶目昏耳重。不知所以爲況。故作書意不聯屬。時有修改處。高明姑領其勤可也。欽跋。欽跋。

與儲子椿

雨不止。山居岑寂。尤渴奉警策。旣難暫遠。又不敢坐致車馬。可勝欽系。忽辱手示。伏審乍冷。侍奉起居佳勝。今日本欲入城。以分付少幹。未有人可託。勢須一二日間。可遂瞻奉。山陽遷改日逼。又凡百萃在一身。念之如在風浪中。不知果能到岸已否。良可懼也。

又

節前奉專人賜教。累祇稠重。所以見求之義。有加疇昔。方時與金陵諸老作緣。欲作報不暇。反展轉十許日。纔了此一段勝事。以故流連鄙誠似已緩矣。當在深照。諭月不雪。氣候如初春。多作上壅。咳唾痞隘。赤

目諸恙老境極不自得不審履況當復何似傾馳款悉甚於茲時如欲插羽翰凌汗漫超出於形骸之外而不可得其所以疊疊於高明者可勝況哉歲晚牢落江山滿前促膝握手歷敘前人經行之舊可慕可原遂將延挹相安得亟逢此迴風倍增款慰

又

新陽固當一舉酒爲君子之慶咫尺不逮我勞如何里閭正以茲時爲勝遇盡醉過從徹交歲無虛日不審能有此樂事否客寓無一如所念者姑念佛杜門乘興作佳好要是窮途究竟如是爾每想像物外亟欲卽之常若有以繫之亦意投懷深盡或有得處於我不間一毫髮也未間時幸寄聲俯慰展轉之懷

又

暎奉忽忽踰月日有馳懷霜秋比想履中佳勝捐書累幅良愧見厚之意封畛非遠時聽聲聞爲慰也餘惟事外自將復謝疎略

又

少別瞻思不展到此首幸款奉然而路牽率玉趾極不遑昨日之煩迂顧雖投分置此形迹其如仰懷未易堪也方得紙筆作謝小童又出簡誨寓意太重遂欲據我於爐炭之上邪皇悚皇悚晚來承動履清勝入城方得就見拳拳之深當候面奉

又

高文讀之聳然。豈出於誠意。故爾條暢。似是抑鬱既伸。詞源自然澎湃也。欽歎而已。某已令謄寫。錯了又改。故差遲爾。更有一端。須相見熟議。副本謹已什襲。

又

自當塗歸。初不得一食頃休息。長倩之所目擊也。所幸形跡相忘。故得以仰依誠照。其如疎略一向。不無可罪。亦庶幾有以自遣。加之風波益可畏。舉動來於不測。本圖歸保故棲。因而卜一作繭處。今又齟齬。不免聽其去來。姑了一日。爲一日計爾。稟賦不厚。投老境界乃如此。可歎。可歎。長倩美才。旣脫非橫。當益刻礪進修。率履古人不到之地。是交游之所懸測。不妨屏他事。粗進飡粥。以激志操。士官固可指日爲期。要當自我而得爲佳。至於報效知己。是爾爲報。奚其爲爲報哉。千萬深亮。無以語直見罪。

又

二月更欲再過當塗。逐日事如蠶作繭。愈纏愈縛。更須入湯乃脫。其何以堪邪。故爾濡滯。悶損。悶損。家居況味如何。七日不舉箸。十年不製衣。亦恐未爲貧爾。一笑。一笑。他須款致。

又

近連奉書。稠重累紙。感佩無以爲況。伏審曲肱樂道。與時御宜。慰忭何已。老倦疲於應接。數次掇拾。欲還莊居。因得展敘。尙爲事奪。瞻跂。瞻跂。於是特枉專誨。疊疊見屬。深畏不忘之寵。自非誠義相求。終見寓於可託之地。何以如此。茶焉不類。但劇負荷。止候一二事竟。卽圖造請。纔稅鞅。便遣人咨候矣。

姑溪居士文集卷第二十六

手簡

與儲子椿

相別遽將七年。初謂卽在華要。歲闌尙爾。得非因爲靜退邪。重於一時邪。欽跂。欽跂。桂玉淹回。自亦難處。定復何可以補外。都城住久。無適不宜。外官豈易彷彿。特俸雖厚。亦不知其爲是。乃不易酬對者。更希裕處。期之必達而已。衰悴旦暮人爾。杳未有會晤之涯。臨筆倍增依黯。萬一得再相見。實所翹跂。

又

伏蒙別紙該貫。彌認冰玉。但密邇玉色。常聞天上語。晚日豈不彈冠。特如老病不調何。宣城田例不復完。良可惜。但無唱之者。守令方時。皆開爽通氣類。似自棄之爾。重祿固難常有。產則能常。頗思之熟否。思永告歸甚促。殊不逮意。續別上記次。

又

昨日獲奉厚眷。幾至抵暮。從容緒言。一一皆可人意。而置食精潔。備盡勲款。超然遠思。頓還舊觀。蓋到此未始有此況也。其爲感慰。可勝道哉。晚歸南寺。已失玉趾。似是無投足地。故不及相待。甚不遑。祇極快悵。方圖上記。遽被翰墨。并佳闋清詩。詞度前人韻。至押到老鈍。遂當絕筆。珍佩何已。適爲南僧約素飯。飯後